

I  
F A C T V M,  
Pour les Prieur, Docteurs & Bache-

*liers de la Societé & College de Sorbonne, appellants du  
Preuost de Paris ou son Lieutenant Civil:*

*Contre Albert de Valence escuyer sieur de Vernueil Intimé.*



A sentence dont est appel, greue les appel-  
lans en deux poincts.

3

Le premier, en ce que les fruiçts du fief de  
Vernoüillet à eux legué en Auriil six cēs huit,  
par la feuë dame de Simier: sont declarez acquis audit In-  
timé, pour neuf années & plus, soubz pretexte de la pre-  
tenduë saisie feodale, & ce en pure perte pour iceux Ap-  
pellans.

Le second, en ce qu'ils sont condamnez vuidier leurs  
mains dudit fief, ou bien à payer indemnité, outre l'hom-  
me viuant & mourant, par eux offert.

Quant au premier poinct, le grief des Appellans est,  
que supposé que par la Coustume de Melun, soubz la-  
quelle ledit fief de Vernoüillet est situé: conforme à tou-  
tes les autres; Il soit permis au seigneur dominant, si tost  
que son fief est ouuert, de le saisir & gagner les fruiçts  
en pure perte: iusques à ce que le vassal ait fait le deuoir.

Neantmoins la mesme Coustume de Melun article  
29. porte vne exception pour les gens de main-morte.

D'autant que quand ils se presentent à l'hommage, elle  
veut que le Seigneur leur declare, s'il entend les cotraindre  
à vuidier leurs mains, auquel cas, s'ils ne le font dans l'an:  
apres iceluy passé, il peut saisir & exploicter en pure perte.

Dont resulte que ledit Intimé n'ayant satisfait audit ar-  
ticle de Coustume, ny fait sadite declaration expresse

A





lors que maistre Nicolas Ysambert Docteur deputé par lesdits Appellans, luy alla faire les submissiōs & deuoirs sur les lieux, par acte du dernier Auriil mil six cens neuf: il n'auroit donc peu saisir, ou s'il auoit ia saisy par precau-  
tiō, sa main-mise n'auroit sceu emporter perte des fruiets, pour si grand nombre d'années.

Que si l'on veut repartir, que par l'article 28. de ladite Coultume, le vassal induement refusé, peut contraindre son Seigneur par lettres du Prince.

Responſe, que ledit article 29. suiuant immédiatement celuy-là, porte vne restriction & exception à iceluy: ſça-  
uoir, que les gens de main-morte ne peuuent vſer de ladi-  
te contrainte, ains que c'est le Seigneur qui les peut con-  
traindre de vuider, & en faire declaration.

Ce que ledit Intimé n'auroit fait, ains impliquant con-  
tradiction, leur demanda le payement de cinq ou six an-  
nées de rachapts du passé, qui estoit taifiblement les acce-  
pter à hommes.

Du depuis, il se feroit restraint à deux, ce qui arguē sa  
fraude & circonuention, de laquelle partant il ne doit pro-  
fiter, meſmement, *quia per eum stetit*, que le fief n'ait esté  
couuert.

Il y a plus que continuant & accumulant fraude sur  
fraude, comme il vid les Appellās auoir interietté appel de  
ladite saisie: pour les eluder il auroit pris bail d'iceux Ap-  
pellans des heritages par luy saisis, ledit bail du sixiesme  
Auriil mil six cens vnze.

Voyla dont commē il s'est departy de ladite saisie feo-  
dale: car prenant bail des Appellans, il les a recognus pour  
posſeſſeurs, & iouyſſant par luy au nom d'autrui, il n'a  
peu faire les fruiets ſiens.

Neluy ſert d'obicter, que par ledit bail il a protesté que



ce fust sans preiudicier à ladite saisie.

Car ladite protestation contraire à l'acte, n'auroit esté valable.

Finalelement l'Intimé recognoissant ladite premiere saisie nulle, s'estant ingeré de saisir de nouuelés années fix cens douze, six cens treize, & autres subsequentes: lesdits Appellans en auroient obtenu autant de mainleuées prouissionnelles par plusieurs sentences du Preuost de Paris ou son Lieutenant Ciuil, dont ledit Intimé n'a point appellé.

Partant puis que ledit Intimé n'auroit rien dit dauantage au procès principal, qu'esdites instances de prouision: il ne deuoit retracter sesdits iugemens dont n'y auoit point d'appel, & ne deuoit adiuger audit Intimé des fruiets de si grand nombre d'années, en pure perte pour iceux Appellans.

Et voila contre le premier chef.

A l'esgard du second, touchant la contrainte de vuidier, ou bailler indemnité, outre l'homme viuant & mourant offert.

Le grief des Appellans est, que comme a esté dit cy dessus, l'Intimé ayant demandé les rachapts de cinq ou six années, & en cela les ayant taisiblement acceptez à homes. il s'est exclus de les pouuoir contraindre à vuidier: il s'est exclus de ceste alternatiue, pour ce que l'option estoit consommée vne fois.

Dauantage ne pourroient lesdits Appellans estre contrainsts à payer l'indemnité, pour ce qu'encores que ledit article 29. de Coustume: soit congeu sous clause conionctiue, neantmoins elle se doit resoudre en disionctiue, comme en plusieurs autres articles de ladite Coustume, & autres especes de droit.



4

Qu'ainfi soit , lefdits Appellans rapportent plusieurs sentences données au fieg de Melun, tant deuant que depuis la redaction de ladite Coustume, par lesquelles auroit esté iugé pour la difionctiue.

Ce n'est point chose nouuelle de voir la rudesse des Coustumes, taifiblement abolie par vn contraire vſage.

Representent auffi plusieurs Arrests, donnez tant en ladite Coustume de Melun qu'autres: par lesquels a esté iugé pour l'alternatiue, de bailler homme ou payer indemnité: & non tous les deux, bien qu'il y en ait eu au passé quelques Arrests contraires.

Mais tout ainfi, qu'au lieu qu'anciennement on condamnoit à bailler homme viuant, mourant, & confisquant: du depuis flechissant ceste rigueur, en a oſté le confisquant.

De meſmes, au lieu que iadis on condamnoit à la conſionctiue de bailler homme, & payer indemnité: du depuis on s'est reduit à la difionctiue, afin d'euter à la trop grande foule & oppreſſion de l'Eglise.

Conſideré pour la fin: que tels droicts ſeigneuriaux ne ſe doiuent exiger à la Iudaïque, ains pluſtoſt par honneur que pour le profit: & que le reſpect de l'Eſchole des Appellans, meritoit quelque faueur ſpeciale: & lesquelz neantmoins pour tous les deuoirs eſquelz ils ſe ſont mis:

*Nec quicquam duram tentarunt Cæſaris iram.*

Partant concluent: à ce qu'en emendant, ils ayent mainleuée de leurs fruiſts: & la deſcharge de l'indemnité, baillant homme viuant & mourant: l'Intimé condamné en tous deſpens, dommages & intereſts.

S. R.

*Monsieur de Champrond Rapporteur.*

